




祭輓彙錄卷五

祭文

維

康熙五十五年歲次丙申夏四月庚寅朔越六日
乙未江南江寧府清軍江防同知加六級紀錄一
次年家弟許鈺謹以剛鬣柔毛清醑庶饗之儀致
祭於

皇清誥封光祿大夫內閣中書加十二級景翁項太封
翁之靈曰嗚呼物有聚而必散人無存而不亡苟
令名之不朽必盛德之難忘惟翁黃山毓秀白嶽
降祥世鍾潛德代炳幽光卜里門之將大迄我翁



而彌彰其始生也自具夙慧聰穎非常出就外傳
默識心藏執經宿儒不愧門牆試輒奪幟旗鼓聿
張旣而念椿萱之並老宜甘旨之是將棄茲帖括
挾策維揚治生齏筴家道以昌遂迎二人而色養
承旨先意竭盡子職於高堂時同堂兄弟屈指有
十共本一祖濟濟鴈行翁皆待之以友愛而視之
無低昂旣經營乎家室復資助其婚喪翁之孝友
如是至其與人交也推誠相與共見肺腸不以恩
怨而殊報復不以貴賤而別炎涼迨夫經理兩淮
持籌謀畫具過人之才而深自斂抑即指陳利弊
切中機宜而不敢自炫爲己長蓋翁之心如一輪

之皎潔而翁之度如千頃之汪洋若其追遠報本
孝思不匱繕祠宇而合饗春秋祀事必使無缺乎
烝嘗推而族姓繁衍廣爲賑恤慮水災之洊至乃
思患而預防築石堤爲保障殫拮据之不遑他如
閭黨之間戚友之內或生不能養死不能葬貧不
能婚嫁患難不能排解以及流離顛沛之可傷賴
翁陰施曲助維持調護使之各得其所者尤算數
之不可以紀量宜乎天眷大德篤生令嗣階盈蘭
蕙室擁琳琅儒林陶鑄藝苑芬芳箕裘不墜於門
內謀猷用佐乎廟廊長君草制東觀次亦佐郡西
方叔季皆鵬騰鵠起諸孫且鳳翥鸞翔翁乃以子

貴顯上及祖父階晉一品恩榮四世各受

天朝之寵錫而並欽

綸綍之煌煌凡茲皆積慶之美報縣縣不絕繩繩克繼而直欲垂裕於無疆鉅也佐郡金陵一江遙隔然慕翁之德高如山斗企翁之志潔若冰霜覩言坊而行表擬玉質而金相方幸老成典型可維末俗奈何昊天不弔遽使騎鯨駕鶴上逍遙於蓬島而下閱視夫滄桑敬採江蘋望風一奠神馳目送悲難自禁因不覺涕泗而徬徨嗚呼哀哉尚

饗

維

康熙五十五年歲次丙申四月庚寅朔越二日辛卯宜祭之辰年家弟王用楫謹以瓣香束帛清酌庶饗之儀致奠於

皇清誥封光祿大夫內閣中書景翁項老年臺之靈前而言曰嗚呼嘗觀箕子之敘五福也一曰壽二曰富三曰康寧四曰攸好德五曰考終命未嘗不太息人生之修短繫於天有氣數以主宰之而人力不能與造物爭瞬息也上古之世其氣純龐其風渾噩而人復無雕鑿物欲之累是以臻上壽者比比皆是迨於今馳騫於物欲聲色之場穿鑿其清

靈堅實之體五十曰不夭六十曰壽終求若君之
大年者蓋亦渺乎莫可多覲矣余自筮仕以來體
天子重老至意每於黃髮鮐背者多優崇禮下之及遷
任維揚於揚士中與君相晤丰神磊落鶴鬚皤然
重之益甚及後聞君居家孝友修譜睦族及重士
憐貧諸行事益信君爲國士方謂天祚善人期頤
可望詎竟溘然即世耶夫以君之享齡將耄而且
琳瑯森森蘭芽茁茁箕疇五福君皆備之似不必
爲君痛然而自君之逝感恩者匍匐哀號沐德者
悲愴流涕閭里之人靡不歎老成之云亡悼碩哲
之遐棄則又安能不爲君悲也敬以一卮奉奠并

爲之歌曰歲律徂夏兮物若遂性胡彼項君兮乃
返厥真抑太上忘情而却累兮抑厭世之混濁而
超塵吁默默兮其何必問大化潛轉兮鼓蕩屈伸
觀一世之民物孰不歸於芳草青燐尚

饗

維

康熙五十五年歲次丙申四月庚寅朔越七日江
南揚州府江防河務同知加一級年家眷弟胡璉
謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項老年
臺先生之靈曰嗚呼翁其長逝耶翁逝而沐澤者
安賴慕義者安仰問字者安從哀遍交遊悲動閭
里宜矣然翁亦何憾於死也人生惟是讀書勵行
上之為前人廣世澤下之為後裔之福基如是焉
足矣今以余所聞於翁者更有溢美焉翁為歛之
望族當成童時即遊學武林與今冢宰浩軒徐公

同師事大聲張先生業成歸里試輒拔其群既而
念兩大人春秋高家復中落乃慨然曰我今以揣
摩廢治生坐缺供養如子職何因謝帖括而策蹇
務遷居維揚由是家復起其委曲承兩大人歡者
蓋無所不至焉敦行之餘留情世務迨實至名歸
凡名公巨卿往來淮揚間者與宦遊駐節於斯土
者皆折節願交而諮以當世之事是公雖不仕而
經濟已被諸世矣翁修於家者美不勝述其大者
尤在爲祖父建祠並修築先代宗祠規制弘闊報
本序倫遠近於是乎觀禮於先代讀書之堂之既
湮者購以重價經營締造擇賢者講學於其中族

之人於是乎知學至宗族之貧寒不振者爲仿范
文正遺法勗置義田廣爲贍給而於銳志勤學者
加厚焉俾智愚咸獲成立族之人於是乎嚮義昔
范文正公好學樂善子皆貴顯累代簪纓不絕今
觀翁之伯子珥筆

禁苑光生琰琬仲子佐郡延安蚤爲民譽叔與季亦復
聲噪膠庠積學待聘而且諸孫玉立彬蔚森森行
見相繼升於廊廟其爲我翁積善之報者實弘且
遠假使翁當家道中落時困於小試而不知所變
計有伊唔老耳安能力行善事廣先澤而福子孫
如是乎即今翁年逾古稀當其歿也而黨族哀之

鄉里哀之交遊輩罔不哀之自非翁之行厭服人
心何以至是乃知固一世之傑也余特爲擇一二
大節以唁翁他如周濟諸事則沐澤者能言之敦
信崇禮諸行則慕義者能道之生平雅好臨池及
賦詩問字者能稱之無俟余喋喋也尚
饗

維

康熙五十五年歲次丙申夏四月庚寅朔越祭日
庚子之辰奉政大夫同知江南徽州府事加二級
紀錄五次年家眷姻晚生張叔珽謹以剛鬣柔毛
清酌庶饗之儀致祭於

皇清誥封光祿大夫內閣中書加十二級景翁項老年
姻臺之靈前而言曰嗚呼黃山之靈練水之精挺
生人傑太阿發矧燦若孤霞炯若列星百尺無枝
矯矯亭亭敦詩說禮掖懦扶傾待人以恕御下以
誠族黨比閭恃公輯寧才捷品高脫略浮名喬寓
維揚月恒日升飲酒敲棋棲神練形草拾金光芝

產玉英丹霄跨鶴赤岸騎鯨天性孝友聚德冥冥
修祠立倉義在勇行穀詒掌嗣祕閣橫經掣電西
池搏風北溟典司政本首鐫御屏次君筮仕續紛
頌聲關中父老愛戴輸情峨山蒼翠鎬水澄清龔
黃再世召杜復生有赫

鸞黃飛馳彤庭鬱鬱堂槐邦家幹楨偉哉維公適觀厥
成移孝作忠勿欺是徵忻逢

警蹕馳道歡迎再拜陳詞

天顏霽欣賜以

宸翰珍若葱珩苟利民社無不推誠矢志清操維白維
精盛世麟遊朝陽鳳鳴玉質金相海隅豔稱嶽嶽

高風人倫重輕踰越險阻稽首

帝京鸛鷺齊班嵩呼載賡黃髮兒齒杖履昇平紫氣青
牛迴翔漢京謂越期頤千億斯齡云胡一疾奄忽
遐征擁霧乘飈十樓五城廣陌哀痛窮鄉悼驚國
逝黃耆朝喪老成珽夙忝姻婭久仰名杯酒酒追
歡通家過庭屢祝嘉祥五福備登溘焉聞訃躑躅
屏營白馬生芻徬徨旆旌旣傷耆舊曷示典型洞
酌陳詞涕集如零惟公鑒格幸來雲輶尚

饗

維

康熙五十五年歲次丙申孟夏月庚寅朔越祭日
辛卯之辰奉政大夫江南松江府清軍督捕海防
分府兼攝本府事加三級年家眷弟許承澎偕男
姻晚生良楷謹以剛鬣柔毛清酌庶饁之儀致祭
於

皇清誥封光祿大夫內閣中書景翁項老年臺老先生
之靈而言曰嗚呼從來劒沒豐城珠沉合浦春迷
箕尾早泣鳳而悲麟歲厄龍蛇忽芝焚而蕙萎莫
不摧心咸深雪涕飛杜鵑之血紅染江峰灑翠竹
之斑紫流湘浦况乃室近芝蘭誼同膠漆自綰符

於鑿水久仰炙其丰儀汪汪若叔度之波濯濯比
王恭之柳迨分刺雲間阻當江永地雖遠而時詠
蒹葭跡雖踈而心多繾綣情何如乎悲可知矣吟
來楚客或因哀管難成響託秦箏亦謂臨風志慟
於維我公人倫模範士類璠璣英年孕玉羣尊為
國之楨早歲騰蛟僉曰洵邦之彥旣言郁以椒蘭
復行成於正大才高繡虎陋三唐兩漢之未工譽
擅雕龍哂浹際子長之未博蓋自晬盤騎竹之日
瑞兆石麟繼當邗江淮海之區望隆山斗矣跡其
孝友性成經猷素裕顧我復我時賡岷岷之篇克
敬克和情叶鵲鴿之夢撫松楸而泣墓圖成三世

山川相原隰以庀工更煥一時丹雘乃永言之可
則亦善後之多方滌溪三面絃聲徹花萼之樓義
畝一成香粒飽水源之衆堅石堤之雁齒夢穩千
家廣喪葬之孝思資周萬類全名全節親被遐恩
成德成才人蒙遠惠矜全其量誠也休休寬愛為
心恕焉藹藹况可型乎更有難者不驕不侈獨却
繁華無伐無施偏多碩畫欣親

鑿輅壘荷

天恩珍盤流 內府之香名果下蕊珠之殿猗歟千載
之竒允矣一時之傑若當花紅戶向間有閒情柳
綠檐齊尤耽韻事烏絲染巾巾之烟雲斑管落行

行之鸚鵡方期露承仙掌頌並岡陵雲近蓬萊怡
情松柏夫何哲人云杳梁木其頽瑤池流鳴咽之
聲綺席泣山陽之笛不堪翹首夫復何言雖然我
公作述相仍不啻班家父子簪紳濟美何慚蘇氏
弟兄奕奕荀龍森森竇桂門楣四姓鳳彩鸞翔姻
婭二姚珠聯璧合交榮綵仗應知冷穴神怡睠彼
宮袍頓令幽宮色喜然而樓前送客尚界粉以成
痕况茲道範無人覓名香而莫續良云已矣能不
悲哉爰藉生芻載陳載酌祝惟丹旆來格來歆尚
饗

維

康熙五十五年歲次丙申孟夏四月庚寅朔越六
日乙未宜祀之辰年家眷世教弟廣西潯州府軍
鹽同知加三級李秉衡仝弟湖廣黃州府糧捕通
判加四級紀錄三次秉乾浙江杭州府水利局糧
通判加四級紀錄五次秉仁候選知州秉政謹以
剛鬣柔毛辨香束帛之儀致祭於

皇清誥封光祿大夫耐菴項老世臺老先生之靈曰嗚
呼維公歛南望族江左名流世多隱德遙遙積善
之家代有聞人赫赫科名之第支分派衍歷數代
而氏系日繁奕葉雲仍迨我公而聲名益振才高

倚馬不難唾手以博功名志切瞻烏遂至決意而
謀甘旨純孝根於至性視聽常凜形聲孺慕極於
終身喪葬皆成典則閨中良友琴瑟靜好以相莊
閨內休風鸞鳳和鳴而協聽誼敦一本購來遺照
拜跪展秋霜春露之情恩洽五宗造就新祠丹牘
極烏革翬飛之致菁莪樂育子姓賴以焚膏泮壁
增輝鳩庀易來蠹朽名卿碩彥叨禮遇以訂交故
友周親望推恩而舉火好行其德情殷無告之煢
煢御下以寬時見慈顏之藹藹若夫式義方之庭
訓玉樹滿階前宛詠絮於閨中珍珠擎掌上經兄
薇垣視草地居清要而鴻望滋隆書兄劇郡劬勩

績著勤勞而鵬翔益遠他若金昆玉友盡屬皇途
驥首之才桂茁蘭芽莫非國寶呈輝之器孫枝競
秀慶四世於一堂福祿同來備九如之三祝至於
老成持重超軼群倫練達經營斯成俊傑憶當先
君承乏兩淮之日正值我公綜持鹽筴之時諮諏
因革劉晏資經濟之弘猷會計權鹺卜式借轉輸
之良策極力備陳商困異數頻加臣工獲覲

天顏殊恩疊沛銀鈞鐵畫仰承

宸翰之煌煌海錯山珍俯餒 天廚而翼翼

龍章鳳詔親膺極品之封人瑞期頤目拭非常之遇衡
等誼叨世講迹實睽違山川修阻欲溯從而碌碌

於簿書鞅掌之勞雲樹蒼茫欲奮飛而忽忽於歲月星馳之速遙念鶴齡悠久永駐人間何期鸞馭飄颻遽昇天表嗚呼排風御氣騎箕歸傳說之班梁姜泰頽極目洒羊曇之淚然而年過七旬躬逢曠典我公既全受而全歸令嗣復善繼而善述夫亦可逍遙碧落含笑九京矣獨是衡等臨風悼嘆撫臆唏噓樹白旌於邗水會葬無因墜紅雨於潯江褰幃奚自炙雞絮酒遠將翹首之思齊薤楚些聊致傷心之痛嗚呼哀哉尚

饗

維

康熙五十五年歲次丙申四月癸巳庚寅朔越祭日乙未江南揚州府督河通判加二級紀錄二次年家眷弟夏賓謹以剛鬣柔毛清酌庶饌之儀致祭於

皇清誥封光祿大夫內閣中書加十二級景翁項太封翁之靈而言曰嗚呼天之所以畀我太封翁與太封翁之所以受畀於天者不綦重乎何以言之嘗觀天之生人最蕃而越軼乎尋常之士則寥寥間出即有馳聲當世推許一時者亦不過挾一技之長擅一德之美而已求其抱卓越之才存仁厚之

心好義疎財光前裕後以一人兼之如我太封翁者蓋亦鮮矣因知天必有以畀之而太封翁亦有以受畀於天也太封翁誕育華宗幼即穎異下帷奮志足不窺園作文竒思煥發每試輒列前茅聲名藉甚一時操觚之士皆拜下風旁及詩詞翰墨靡不窮其源而窺其奧暨乎經理鹺務紀綱兩淮凡所籌畫動合機宜遇有關係鹺政之事挾策建議燎若指掌儕輩皆服其經綸而歎其卓識故名公鉅卿皆折節願交而各憲亦刮目優禮實太封之抱負有以傾動之也此其卓越之才爲何如者而且秉性慈祥勤勤樂善其於宗誼尤爲敦篤族

人所居瀕水衝決無常乃爲增修石堤以衛廬舍又創立義田以周不給其有銳志嚮學者則資其膏火力爲成全必期造就至於姻黨或有事故必挺身調護竭力維持凡此數端最其昭著者也若其細行班班尤難枚舉此其仁厚存心爲何如者太封翁處於素封不屑屑爲財帛計每有義舉首先倡率新安學宮久頽太封翁以爲六邑育材之地即鳩工修葺得以煥然念津渡之病涉則廣建橋梁見里黨之貧乏則不吝周恤以至排難解紛濟人利物之事惟力所及孜孜不倦此其好義疎財爲何如者又以宗祠傾圯太封翁追溯淵源亟

爲修築兼構祖考兩世專祠以昭禋祀復念潛德
未彰恭逢

特典因爲籲請祖考并荷

恩榮俱膺褒贈品秩之隆無以逾之此其光大前業爲
何如者太封翁義方素著而諸嗣君能克紹箕裘
皆策名

天府鼓吹休明自此而游卿班歷顯要指顧可期且蘭
孫濟濟亦復崢嶸頭角縣遠之慶正未有艾皆太
封翁樹範貽謀有以致之此其垂裕後昆爲何如
者嗚呼若太封翁之衆望攸歸無美弗具者非天
有以畀之亦何能若是哉正宜益懋遐齡永享天

祿爲

聖朝之人瑞作邦家典型胡乃遽棄人寰仙遊閬苑豈
天之善於始而戾於終奢於前而嗇於後歟雖然
太封翁年逾古稀禮隆杖國壽算不爲不永矣功
昭郡邑惠及閭閻德澤不爲不溥矣芳聲垂於奕
世令聞重於當時名譽不爲不隆矣

龍章寵錫備沐

殊榮而且玉樹蘭孫後先接武食報不爲不厚矣太封
翁夫復奚恨乎於此益信天之畀我太封翁與太
封翁之受畀於天者鑿鑿其不誣也余服官於揚
得悉太封翁之才行雖往還有素而不獲時親芝

宇備聆微言不禁爲之歔歔悼歎而不能自己也
爰陳絮酒用告几筵太封翁其亦足其言而鑒之
否乎哀哉尚

饗

維

康熙五十五年歲次丙申孟夏宜祭日署江南揚
州府糧河通判事年家眷晚生夏建鼎謹以剛鬣
柔毛香帛庶饗之儀致祭於

皇清誥封光祿大夫內閣中書景翁項老先生之靈曰
嗚呼緬溯高風德溫如玉裔衍姬周業弘邗澳詞
賦雄才淵源家學累世簪纓經綸紹作名重泰山
望推梁木有物有恒言行超卓貴顯不矜謙和自
牧頰首挾齏家計盈足建祠修塋孝思誠篤惠賙
內外廣施舟麥燕翼貽謀嘉猷式穀過庭詩禮有
書皆讀濟濟象賢齊名敦福玉樹芝蘭階庭芳馥

福斂箕疇秩登光祿四世一堂滿牀牙笏

御書寵頒恩榮優渥矍矍吾翁期頤可卜奚天不憖奪
翁之速傳說逍遙乘箕駕夙柱礎傾頽三能隕落
州里罷春閭閻遏樂淚雨淋漓愁雲黯黯嗚呼世
方崕嶮德斯高矗世方波流清斯反濁功著旂常
聲垂史牘義薄雲霄節同松菊一朝化蝶千年返
鶴形謝塵寰神遊大漠晚也向理潤城素欽叔度
仰止高山願承矩矱今莅維揚擬親教育方謂識
韓可瞻面目俄聞訃音令我錯愕謹酌清泉廣陵
一掬蒿里三章於今再續嗚呼尚

饗

維

康熙五十有五年歲次丙申四月庚寅朔越宜祭
之辰江南徽州府糧捕通判加一級紀錄四次李
鏗謹以剛鬣柔毛之儀致祭於

皇清誥封光祿大夫內閣中書加十二級景翁項老先
生之靈曰於戲繫惟我公邦家之杰不弔昊天俄
摧其哲賴茲懿行用光克彰藉揚潛德庶久彌芳
溯厥流源簪纓繁庶自晉迄唐歛南最著公性純
穎天挺異姿讀書默識致疑於師援筆斐然名高
班馬業受曲江不虛名下襄陽筆陣太白詩篇恢
恢游刃又不餘傳言念蝸名廢書喟歎甘旨是圖

籌齏握算才展經濟名動鉅公兩淮諏詢厥惟我
翁廿四橋邊月波樓畔碩德老成群推為冠顛求
甦困俯伏陳情

天顏有霽

賜典特榮論公之才庶邀異數述公之行更銘道路怡
親色養迎志克先視膳問寢生事禮全洎抱終天
安塋於坎夢穴得吉至誠所感追遠報本不惜萬
金舊新宗宇輪奐嶽岑滌溪之堂九世之澤購址
復興流風似昔先靈不爽憑是式依千年遺像華
表同歸從舅如胞友愛無間或助釜薪或分憂患
維彼子姓實繁有徒聚廬而處盈歉攸殊乃法希

文義田舛置葺譜增堤聿新廢棄公之孝友本於
性根公之德業流於子孫爰俾熾昌荀龍獲半薇
省珥毫金明佐贊職遷秩晉光祿

馳封恩榮寵渥行際夔龍玉砌蘭蓀筆花墨陣蜚譽成
均高騫目瞬光門炫第永永緜緜誦公餘慶如源
涌泉宜享遐齡壽考靡竟詎意一朝遽辭塵境若
錙鉛刀初試夙慕高風天都三載景仰何窮木壞
山頽中心是悼瞻望靈帷陳辭以告生芻一束魯
酒三巡惟希鶴馭下降來歆嗚呼尚

饗

維

康熙五十五年歲次丙申孟夏月庚寅朔越六日
乙未原任蘇州府管糧通判年家眷弟李廷柱謹
以剛鬣柔毛清酌庶饁之儀致祭於

皇清誥封光祿大夫內閣中書加十二級景翁項太翁
老先生之靈曰嗚呼少微失耀龍泉去津金爐灰
冷玉律候更猿啼空谷弦響哀箏寒潭月照野渡
舟橫哲人其萎用誅陳情仰溯世系舊德家聲我
我閔閱纍纍簪纓天聰內映神理外瑩箕裘克紹
棣萼長庚嗚呼我翁齧網是理家政是親一言一
動如式如金可法可則乃身乃心撫摩稚幼愛惜

如生諸凡調護百計經營嗚呼我翁恬居養和含
蘊不吐重傳尊師圓規方矩純孝格蒼輯族感舞
飽飢燠寒常傾囊釜善氣迎人如飲醇醪積厚流
光徵之繩武于門誕啓德隆今古嗚呼我翁貽謀
既穀

帝眷斯勤發越賢嗣作世名臣或選郎曹粉署承恩或
官外任憲副名崇率由家學待展經綸永膺鼎養
福祿駢臻嗚呼我翁居中澹泊秉性謙退高不忘
卑顯不忘晦隱德益彰深人感佩桂馥蘭芬奕葉
世輩嗚呼我翁優游杖履頗事維摩秋月春花樂
我天和曾元繞膝含飴笑歌胡為羽化星返長河

廷柱夙叨交好把酒問天大德必壽况號陸仙典
型云往音徽永緜青松白石銘彼原阡鶴歸華表
千古翩翩爰陳椒醴用申微虔靈其來格矯首來
旃嗚呼哀哉伏惟尚

饗

維

康熙五十五年歲次丙申孟夏月宜祭之辰署江
南淮安府事本府清軍督糧鹽捕通判加二級王
芝謹以剛鬣柔毛庶羞不腆之儀致祭於

皇清誥封光祿大夫內閣中書景翁項老先生之靈曰
嘗聞昔人死而不朽立德立功垂永久一節可
傳矧復兼有嗚呼項公聖師之後家世歛南公始
少年從事簡編夙因天授志氣高騫六籍鎔貫剝
落言詮揮毫抒紙詞翰雲煙具此英異指日花磚
公忽自思學期有用不止於斯人生大節子孝父
慈設誠敦行屏去卮詞登堂奉養出入護持嗚呼

項公維公之孝維德之基公族最盛子姓振振自
經兵燹或富或貧公能兼濟厥愛維均有女未字
有男未婚維結朱陳維絲伊緡或立義田食有所
給或賑災荒如拯其溺施及外家不遺疎逖載新
宗祠兀兀其特築以大堤水不衝激憶在甲乙公
客維揚時維山寇竊發其鄉公迎父母就養無方
周旋左右甘旨親嘗怡怡色養壽而且康兩淮控
制冗集齟綱昔時劉晏轉運流芳時移法久名在
實亡整齊通達急賴劬公殫厥心夙夜思尋何
以輯姦言就其擒何以濟衆若沛膏霖兼併乾沒
曷以厲禁私竇請託曷以嚴懲敬陳當道罄公厥

忱持籌借筮如進規箴課無逋賦額無滯津維公
之誠維公之能歷年五十厥功如新奕奕
翠華昔時南幸公以老成首陳利病鑒公至誠
九重動聽寵錫頻加曠典特盛追念昔賢後先輝映嗚
呼項公身膺顯秩

紫誥花封上追先代光耀祖宗施及後嗣宣力效忠紫
薇深處筆鉅詞雄治行第一懸魚軾熊矧公樂易
先達交推地當孔道北海樽開坦懷相與胸絕疑
猜可瞻可仰如山之岱可洄可溯在水之湄憶昔
交誼廿餘年來長君次君朝夕追陪忽聞凋謝能
不心哀宅相程翁芝忝陳雷寄公行述掩卷傷悲

鳴呼項公瓊樓非迴金闕非遙精誠不泯優游絳
霄楚些雖賦公聽則高遣詞薦幣丹黃荔蕉茗蒿
悽愴以寄長號尚

饗

維

康熙五十五年歲次丙申四月庚寅朔之四日原
任江南揚州府管河通判年家眷弟金依孔謹以
剛鬣柔毛之儀致祭於

皇清誥封光祿大夫景翁項老先生之靈而言曰嗚呼
太翁其遂止於斯耶奈何拜別未幾胡遽溘然而
長逝也耶追憶音容依稀可接而太翁之先占籍
歙南源遠流長垂貽德澤而科第連綿迨太翁應
運而生克光前業佑啓後人海內歷推家世之盛
莫不以項氏爲巨擘焉移居廣陵首挾齶策凡齶
政之利弊靡不因革興除計深慮遠最爲視齶諸

大人所欽敬久矣維揚地當孔道一時名公巨卿
聞風嚮慕得締交而叨隆光者難更僕數且樂善
好施單寒孤介之輩盡荷贍給更創置義田俾族
中之貧乏資其溫飽廣陵一郡待以舉火不啻千
百餘家名播遐邇眷隆

當宁生有四子俱公輔之器無殊潁上星明諸孫森森
玉立皆繩武之良材興宗之美裔濟濟乎簪笏盈
牀乃奕世載德天之福善曾無毫髮之差太翁年
逾古稀而綜理庶務雖精練少年有不如貫穿古
今雖宿學名儒有不逮然平生大槩非言語所能
述也胡昊天不弔一旦溘然而長逝也嗚呼訃音

一出哀動遐邇白馬素車充塞道路廣陵一郡竟
為衣冠叢萃之藪兒孫哭臨於總帳弔客稽首於
靈前設明器陳俎豆珍錯離離太翁至此夫復何
憾惟是典型之遽杳模楷之忽逝為可悼耳弟瞻
依丰采有素不料永別興悲謹列生芻惟我太翁
幸鑒之庶盡愚忱諒太翁必來格而來嘗矣嗚呼
哀哉尚

饗

祭輓彙錄卷五

祭輓彙錄卷六

祭文

維

康熙五十五年歲次丙申四月庚寅朔越祭日戊戌兩淮都轉運鹽使司泰州分司加二級年家眷弟丁世隆謹以剛鬣柔毛之儀致祭於

皇清誥封光祿大夫內閣中書加十二級景原項公之靈曰嗚呼地拆幽燕峰頽恒霍珠斗芒寒蒼穹氣薄咸陽之樹西靡少微之星夜落百身莫贖嗟神理之茫然萬世難追歎儀型之闕若固列郡所同悲尤微情所獨愕緬維景翁之生平歷古今而烜

燦傳家則望本姬周邁種而人呼項橐年當弱冠
輒有饌乎百家時甫勝衣已笙簧乎八索出就外
傳見重南州遊學四方受知伯樂洵哉文壇之眉
目展矣士林之鵬鷲未幾而羣飛蛾賊白馬如風
爰集鷗兒青袍似雀思顯揚兮何時盡子職兮奚
擇遂違呂老之灘奚宅淮王之郭小沛則巷陌無
訛新豐則田廬如昨於是薄繡虎之微長鄙雕蟲
之末學術祖陶猗人方鄭卓如雲遊騎夜控三條
削脯販脂晨啓五幕奉潘輿而登降戲萊綵而資
噓由是室先宗廟獨任經營地重膠庠捐金繩削
瞻棟宇之嵯峩梓材丹雘復紫陽之舊跡事功磅

礴而且倣范公之義舉鄉黨沐其恩膏效魯連之
排解多士蒙其被濯慷慨志存孝友性樂持身謹
飭言有物而行有恒宅心平坦仰不愧而俯不忤
宜其階滿芝蘭子瞻旣校書東閣庭盈玉樹潁濱
亦彈冠西漠入小侯之第玳瑁千重適衛尉之園
珊瑚百托

翠華南幸青旻得躋鷓鷯之班

宸翰聿隆紅紙如捧鳳皇之裸隆叨承之於茲土時獲
躬聆夫教鐸未解藏吾欣覩仙靈之品逢人說項
屢贊天邊之鶴方擬祝夫期頤遽上征於遼廓欲
模範夫弁冕遂下同於隕籜痛老成之凋謝悼大

雅之不作嗚呼死生亦大不得引達人齊物之談
存順歿寧或可援太上忘情之格况壽軼乎古稀
其得天也不薄立功立德豈必工不死之方可法
可傳亦奚羨長生之藥願暫駐夫靈旂庶來歆於
斯爵嗚呼哀哉尚
饗

維

康熙五十五年歲次丙申十月丁亥朔越祭日甲
午兩淮都轉運鹽使司通州分司加二級年家弟
趙元謹以辦香束帛清酌庶羞之儀致祭於

皇清誥封光祿大夫內閣中書加十二級景翁項老年
臺之靈曰嗚呼天生我翁豈偶然哉上而當事下
而同儕交相倚重握算兩淮條焉遐逝豈不驚駭
嗚呼我翁誕降高門髫年出衆迥異絕倫十五遊
學就正賢人才思灑落提筆能文同學宿儒目為
老成抱此偉器直取功名翁念椿萱謀養為殷棄
去帖括客於廣陵運畫齋策利弊洞明前後院使

垂意諮諏條分縷析賴翁持籌翁實諳練運用優
游一時同輩咸推祭酒以故聲譽上達

宸聰翠華南幸禮渥優崇特邀

帝眷天語隆隆人世罕覩千載殊榮獨翁謙約愈絕矜
張性敦孝友誼篤倫常晨昏定省色養高堂我翁
大孝始終不忘逮失怙恃擗踊摧心哀號泣血涕
淚填膺春秋霜露蘋藻殷勤宗祠並峙煥然重新
他如好善澤必旁流族有貧乏欲贍無由義田廣
置衣食必周至今戴德謳歌弗休更見郡學木壞
風傾翁首倡義不惜捐金宮牆培植青青子衿聯
芳甲第人物科名至於持已和平御物德不望報

怨不拂拂樸實則喜華囂則艱閱歷多年可法可
則宜翁壽考陸地神仙期頤上壽長享天年胡為
仙逝跨鶴雲煙所可慰者嗣君多賢伯仲季玉
樹琳琅為楨為幹聯絡騰驤文孫濟濟才具優長
曾元奕奕蘭桂齊芳

誥封一品榮被九京我翁含笑遽赴幽冥余忝知己清
筵是陳神其在天來格來臨嗚呼尚

饗

維

康熙五十五年歲次丙申四月庚寅朔越八日丁酉原任兩淮鹽運泰州分司加二級年家眷弟劉日輝謹以剛鬣柔毛清酌庶饘之儀致祭於

皇清誥封光祿大夫內閣中書加十二級景原項公之靈而言曰嗚呼世有奇偉之士雖年登大耋人必愈仰其型儀及其歿也夫有不遠邇悲悼追思而不輟者以其德之入人甚深而其功之足以服人也若是者我景原項君誠其人也歟憶予之來宦也於吳陵之東亭是隸地雖距揚一二百里而予以齎務得常常晤君當其始已與君為莫逆交矣

殆久而見君之素行蓋兩淮之礎柱而羣賢之領
袖事事爲其同輩所推如車倚軸乃能共效其馳
驅似網在綱無不仰資其提挈嗚呼真一時之人
傑也蓋與君爲金石交者多歷年所矣及於奉委
道篆雖京兆五日其時蓋與君朝夕接見而領君
之教益者何可勝數凡鹽筴之中有害之當除也
就君焉是資有利之當興也必君焉是決其豐功
偉烈誠難以一二數者予又以親炙之也而與君
爲久敬交矣論君之獲報於天固已數踰花甲年
登大耋然人而爲尋常之人則亦已矣若君之關
係乎兩淮者何其重而可以溘然仙去也耶猶憶

皇上南巡勤恤民隱免贏餘減加勸貸內帑緩帶征
殊恩疊沛商業振興皆君不憚勞瘁奔走呼籲於其間
也此又予於

聖駕駐蹕之所親見而兩淮之所佩銘不忘者也嗚呼
其功不足以服人乎聞君之於族黨有范文正公
之風婚嫁贍養義而有法子姓家業雖在維揚而
故土舊山時時在念創修祠堂鳩聚族人雖費不
貲曾不少顧斯其德之入人也又何如嗚呼天何
不弔遽奪之也耶予年來之遊於茲得與賢嗣周
旋知繼起有人况振飛於朝皆萬夫望耶君亦可
含笑於九京矣獨是模範雖存梁木忽萎使人不

能已於悼歎灑淚耳生芻一束以寫生平君之靈
兮來格來歆尚

饗

維

康熙五十五年歲次丙申四月庚寅朔越祭日壬
辰兩淮都轉運鹽使司經歷司加一級楊俊知事
加二級郭廷珍謹以辨香束帛清酌庶饗之儀致
祭於

皇清誥封光祿大夫內閣中書加十二級景翁項太翁
之靈而言曰嗚呼德星隕墜曜隱埋光蘭摧楚畹
玉毀崑岡泉聲嗚咽樹影凋傷繫惟太翁簪笏冠
裳蟬聯甲第奕葉生光由歛遷淮再宅維揚太翁
誕降逢時熾昌幼而穎異一目十行下筆立就才
思汪洋同學儒輩遜讓弗遑負此偉器功名莫量

塵念椿萱子職是防棄去帖括挾策邗江籌畫鹽
筴洞達有方直言利災片語津梁一時儕偶莫不
稱揚歷任當事致禮廷將寵優異數迴出情常

天子寵嘉頒賜琳瑯贈階一品

封誥煌煌名公巨卿物色如狂爭相結納藉為舟航同
事諸公群奉指南惟我太翁愈絕矜張性敦孝友
誼篤鄉邦崇祖敬宗源遠流長報本追遠春露秋
霜修墓建祠禴祀蒸嘗義田設置加意秀良學宮
重建六邑生光太翁好生飢寒恐戕募傭成祠以
作救荒活人無算澤沛鄉黨仁至義盡

國史徽揚令嗣翩翩班馬頡頏伯仲叔季聯絡騰驤文
孫濟濟才品優長曾元奕蔭蘭桂成行正期食報
耄耄無疆詎料嬰疾脫然形尫胸無遺憾駕鶴徬
徉太翁含笑瞑目泉壤俊等叨好聞訃心傷敬陳
薄奠靈其來嘗嗚呼尚

饗

維

康熙五十五年歲次丙申夏四月庚寅朔越七日
宜祭之辰江南江北揚州營遊擊加五級眷弟艾
國朝謹以辦香束帛清酌庶饗之儀致祭於

皇清光祿大夫內閣中書加十二級景翁項老年親臺
之靈而言曰嗚呼天之生人必非無故而人之承
天亦豈易言從未有德之不立而能邀蒼昊之眷
佑以獲報於無窮者之蓋源遠者流長積厚者流
光自古有然詢不誣也惟公性秉孝友心篤慈祥
其持已也克恭克慎其接物也勿二勿欺至於利
濟之事孳孳為之老而不倦且毫無吝惜之心市

德之色是以大江淮泗黃童白叟無不知有項公其人者不特此也前此

皇上南巡駐蹕高旻寺我公獲覲

天顏頒賜

御書克食誠為千秋曠典無訖當事以迄同儕無不服其經濟深有補於齷政者乃謂老成在望是則是倣以長為斯世斯人之倚賴也胡天不弔不遺一老竟令其駮鸞駕鶴而去也夫天之生人盈於宇宙苟無關於人世而徒泛泛悠悠舉凡天地之缺陷民生之利害族黨之欣戚漠然無所動於中則其死也亦只付之輕煙弱草而已若我公者豈其

然乎烏可以死也今日者竟溘然長逝矣悲又當何如耶雖然公雖死猶之乎未死也何也公之碩德大業昭著於人耳目間以傳之於無窮矣而玉樹盈階或草奏鸞坡或分猷劇郡或有聲雍序俱邀不次之超擢行將大展經猷蘭蓀聯翩鵲起又繩繩乎未艾嗚呼德如我公可云至矣福如我公可云備矣生有盛德歿有令名歸而嘯傲於三島瞑目於九京焉抑復遺憾則信乎天之佑人也必以福而人之獲天也必以德焉朝守此土素慕高風常懷有道訃音方主不勝欷歔歎惜而泣下也用是從諸君子後聊寫短章以志哀思靈其不昧

祭朝堂金卷六
來格來歆尚
饗

維

康熙五十五年歲次丙申四月庚寅朔越四日癸巳江南奇兵營分守江儀等處地方遊擊加一級年家眷弟李馥謹以剛鬣柔毛清酌庶饒之儀致祭於

皇清誥封光祿大夫內閣中書加十二級景翁項老年翁之靈而言曰嗚呼靈壽委秀德曜潛輝老成凋謝大雅云亡念音容而已杳追色笑而無從烏能不令人遐思德範而涕泗漣如耶維翁家世簪纓代多偉人其先世之亞顯仕而著勲猷者不可勝數至翁生而岐嶷賦姿穎異讀書一目十行俱下

長而爲文高古浩瀚爲名宿所推重乃以養親故
遂棄咕嗶而從事齏糗運籌經畫每中肯綮一時
名公卿士咸相引重凡齏政因革必商之於翁而
無有不當非翁之經濟夙裕不克臻此也至其事
親以孝交友以信敦本睦族濟困扶危排人之難
解人之紛其善行不可殫述雖古王彥方范文正
堪與頡頏焉是以天報碩德昌其後裔或望隆內
翰或分符大郡行見晉秩台垣翱翔臺閣繼翁之
志述翁之事而且文孫濟濟發達尤未可量謂非
厚積之所致歟正宜永膺鶴算胡一旦竟溘然長
逝耶不腆薄奠聊摠悲哀神如不昧幸來格而來

歆嗚呼尚

饗

維

康熙五十五年歲次丙申季夏月己丑朔越宜祭
之辰奉直大夫山西大同府知朔州事年家眷姪
制陳士炯全弟士煥謹以清酌庶饗之儀致祭於
皇清誥封光祿大夫內閣中書加十二級景翁項老伯
之尊靈而言曰嗚呼人生無百歲而百歲中之遭
遘不齊顛倒於命數而莫逃者何可勝道求其第
祿永康令聞遐播能無忝此百歲中者唯大德實
足當之如我翁生當岷岷性篤古道納身軌物笑
言舉止在在楷模且也發斂深藏鋒穎不露處已
若不足而德容恭貌令人若對衣冠飲醇醪內外

上人無間言無舛事雖處素封節儉為風絲粒不
殄費及遇鄉里啼號婚喪未舉者傾囊慨贈不計
也翁族姓繁衍復新六百年祖基為名勝遊覽之
地修宗祠設義田保護鄉里築數百丈長隄環石
以固禦水患安族人之取處者數千室一時令聞
傳於遠近為兩淮第一人歷動諸當事之欽仰凡
關雝巨細無不奉教也而閒情逸致即嘯月吟風
古歌近體逼近漢魏垂白猶能作楷得襄陽華亭
之奧上邀

天子之寵榮下為鄉里所欽重備人間五福蔑以加矣
如膝前四丈夫子或名高薇省或觀察大夫諸孫
曾文章經濟名列仕版今我翁壽過古稀身居一
品人間哭死之聲自不及聞况將來

貶封疊見使赤黻朱輪駢集墓門之外翁雖死之日猶
生之年也翁其有知必將聽斯言而輒然一笑也
嗚呼尚

饗

維

康熙五十五年歲次丙申夏四月庚寅朔越祭日
癸巳之辰文林郎知江南揚州府江都縣事年家
眷弟李蘇謹以辨香束帛清醑庶饗之儀致祭於
皇清誥封光祿大夫內閣中書加十二級景翁項老年
親臺之靈而言曰惟公稟黃海之間氣承累葉之
簪纓幼崢嶸而岐嶷長共友而慈仁學帖括於錢
塘試和羹於廣陵發言動中夫機要高名傾動乎

公卿逮

翠華之南幸方駐

蹕於高旻奉

天顏之有喜謂兩淮之老成蒙
賚予之稠疊沐曠代之

殊恩尤撝謙以自牧無幾微之自矜篤木本與水源美
宗祠之奐輪獲千年之畫像續滌溪以課文義田
彷彿乎文正施及乎三黨之姻親常扶危而濟困
好排難而解紛去秋舉七表之華筵今春騎白雲
而上騰彼旦暮之榮落曾不少芥蒂於其心祥旣
鍾乎令嗣慶延及乎孫曾方遞翔乎天路行世掌
乎絲綸奠隻雞與絮酒庶靈爽之式憑尚

饗

維

康熙五十五年歲次丙申四月庚寅朔越五日甲
午之辰文林郎知儀真縣事加三級年家眷弟袁
斯恭謹以剛鬣柔毛牲醴束帛之儀致祭於

皇清誥封光祿大夫內閣中書加十二級景原項先生
之靈而言曰嗚呼古來哲人賢士天之篤生也固
不偶而其關於宗黨世道也亦甚大如景原先生
是矣先生世系新安管纓累葉姑勿具論且以生
平孝友品行略言其槩先生幼就外傳嘗與武林
大冢宰浩軒徐公同叩事張大聲張故錢塘宿儒
四方學者執贄盈門於先生及徐公獨加契重為

文提筆立就不加點綴動合矩度會家業中落不屑遨遊京國慨然置舉子課為次車日運籌操筴於鹺務之間為高堂誦甘旨不數稔遂雄視陶白名甲一時何其偉哉然居恒手不釋卷博綜古今馳獵子史最好臨摹古人法帖大小行楷酷似蘇米復留心詩律出句高華雄邁不減唐賢風格秉性公直以禮自持毫不可干以私而與人交實和藹如坐春風中然諾不苟坦衷及物深得夫子忠恕二字之旨終身行之若不逮故不獨聞風慕義者相推重而士林高行咸謂先生如郭有道范希文其人可師其詣不可及也處家以天倫為本事

二人以孝睦宗族以恩周親朋以信課諸子以義方而尤於宗族根本間厚加培植是亦今世所僅見者耳

皇上南巡惟先生老成知大體為同輩所首推具本叩陳獲覲

天顏頒賜

御書克食噫何其熙哉恭自丙辰承乏真州得與先生交殷殷懇懇不設城府不務機械四載以來猶如一日且與嗣君中翰公副憲公最厚得悉先生之盛德意先生之氣誼慷慨精神矍鑠自當永膺大年俾得諮訪所不逮何遽厭塵世而返瑤京也耶

先生年踰古稀齒德並尊而且繞膝芝蘭皆成廊
廟偉器沒而可祭於社者其惟先生歟第恭景仰
方殷情深何極痛老成之凋謝慨盛德之淪亡不
禁爲之欷歔泣下耳生芻一束酌以絮酒靈乎不
昧來格來歆尚

饗

維

康熙五十五年歲次丙申九月丁巳朔越宜祭日
河南彰德府安陽縣知縣加二級年家眷弟徐樹
敏遣男德裕謹以瓣香束帛之儀致祭於

皇清誥封光祿大夫內閣中書加十二級景翁項老長
兄先生之靈曰嗚呼代有世貴而尠世賢光岳儲
靈惟德之全完名純嘏翁實兼焉溯厥行藏哀然
逞哲湖海颺馘斗山振絕秋浦雲峰淪茫帶嶼擣
華擷藻繡虎雕龍三都辟貴五摠推羊歛南旗鼓
式筦其宗猗嗟吾翁金追玉琢聖世真儒天民先
覺範範模模繩於後學維則孝思迺寄崑潯頰首

齶策計然是任甘旨可謀寧顧謳吟早暮營營載
娛親志喜懼交惕篤於所事生養祭葬純孝無二
修山葺祠追遠祀先本支同氣渥意周旋繪圖傳
譜卜世卜年齶政運籌機宜允亮譽重維揚冠蓋
崇尚因革諮諏不爽銖兩會
駕南巡商困在憫具本叩陳荷蒙

俞允貸帑緩征殊恩下賑爰邀

宸眷喜切痼瘵

御書克食曠典是頒老成經濟自非等閑象賢不偶萬
里翀塵伯仲叔季胥通要津巍然甲第以慰陶甄
五花判字半刺分猷虎觀橋門聲邁韓歐鶚搏鷗

化俟可疑眸孫郎雀起頭角崢嶸岐嶷天賦八斗
才宏聯翩而飛國幹家楨嗚呼吾翁江南大耄道
德文章匪孱匪歉祿位名壽匪艱匪闕况茲戩穀
皇心簡在紫誥輝煌青箱晡夢宜注丹奩優游沆漉云
胡勸息厭埽粃糠御風直上騎箕高翔溘焉委蛻
遊於帝鄉樹敏桑梓雅誼薦蘿余屬素稱莫逆投
分殊俗相臺羈宦遂踈侍玉十年契濶寤想方篤
倏讀訃音可勝躑躅有芻一束有醴一卣敢將素
楮用告元騶靈兮如鑒來格悠悠亂曰皤皤者翁
之壽耶振振者翁之後耶龍尾遙遙翁其升而就
耶雞炙紛紛翁其降而侑耶哀哉尚

饗

維

康熙五十五年丙申歲四月癸巳朔日庚寅越有
八日宜祭之辰 賜進士出身文林郎知江南滁
州全椒縣事年家眷晚生汪兆熊謹以剛鬣柔毛
清酌庶饗之奠致祭於

皇清誥封光祿大夫內閣中書加十二級景翁項老先
生之靈前而言曰嗚呼公之生也有自來公之沒
也有所為故上而懸為星辰下而結為河嶽中而
垂為典型斯乃稟正氣孕精英為斯世斯人之砥
柱其令人痛哭流涕而不禁者原不係乎一身一
家之私公生而穎異過人才美機雲文高屈宋不

務纖詞綺語追逐時流及謝章句小試籌畫紀綱
淮巖左宜右有皆能人之所不能以故名公鉅卿
交相引重後先當事遇以殊禮公識時務明大體
聖駕南巡兼知公老成練達

特恩頒賜御書克食而公深自謙抑無少矜伐此其豁
達推賢之意尤卓然於儔輩也內行素稱完潔敦
倫睦族無所不至入其里梓材丹雘惠公功矣烏
革翬飛奠神宮矣湖光瀲灩長堤臥龍矣樹影扶
疎墩阜鬱葱矣高碑列塚追遠尊崇矣谷菴滸葛
賑恤帡幪矣公多不朽之業食報正未有艾今觀
其子孫鸞停鵠峙或登

朝右或理封疆豐功偉伐行光史冊當不僅以簪纓稱
豔一門已也熊曩謁選燕臺從公甥封翁程先生
遊知公之懿行稔矣及宰譙城與公內姪嵩年羅
年兄爲道誼交悉公之生平更確雖未挹其風采
渥其汪洋而尺素往還荷公之眷注藉公之周旋
爲獨深也嗚呼公之生也有自來而其沒也有所
爲旣以痛公之沒爲斯世斯人之不幸斯固亦情
之所不容已也不腆奠獻唯公鑒之伏惟尚

饗

維

康熙五十五年歲次丙申七月戊午朔越宜祀之
辰 武英殿纂修官 特授直隸順天府武清縣
知縣加一級年通家眷晚生裘巖生仝弟候補通
判函生姪肇鼎肇恒謹以瓣香束帛之儀致祭於
皇清誥封光祿大夫內閣中書加十二級景翁項太老
先生之靈曰嗚呼梁棟摧頽穹蒼氣薄悼神理之
茫然悵儀型之闐若褫懸待士俄看虛室塵封星
燦名賢忽覩中宵石落淚浮碧漢涕灑清池蓋道
喪英賢固遠近之同悼而情深世誼尤衷腸所獨
悲緬惟我翁碩德堪師丰裁足學亭亭琪樹之姿

矯矯碧天之鶴冲襟而霽月光風粹質則金精玉
璞英年藝苑蜚聲真馬歛溪名彥早歲雞壇奪幟
足誇南國文章瀟灑賦詩白雪黃金之句縱橫落
筆銀鈎鐵畫之長豪氣橫空百尺樓之標舉嘉謨
足法五百里之賢良自應天路翱翔騰聲上苑而
乃心專定省息意名場才如管子之賢論究桓寬
之術先君巡持繡斧酌利病以通商我翁握算齏
籌展謀猷而足國宜因宜革必委任悉心迺詢迺
諮亦披誠殫力嗣後判袂各天匪朝伊夕惟聞開
樽北海效投轄之高情共羨結友西園盡下牀之
上客頌孝友於君陳擬慈和於萬石育傍梗之荆

樹恩甚同生撫異本之萱枝情逾自出澤必旁流
恩能逮下居常不競衆推涉世含弘性本靡爭咸
服居心渾化以茲篤厚用卜蕃昌剖玉於荆山並
連城之價採珠於合浦爭不夜之光共欣競爽郊
祁已邀

榮命佇看齊驅軾轍並授珪璋濟濟蘭孫盡屬朝家之
楨幹森森玉樹莫非廊廟之棟梁信號世間人瑞
足稱地上行仙何期玉質遽上瑤天嚴等情馳吳
越路隔幽燕訃書未及凶信忽傳仰星漢而無槎
中心忉怛溯泉臺而何路涕淚潺湲忝居世講永
誌遐思公可作乎曷逍遙而降鶴靈如昨也倘來

格而乘螭嗚呼哀哉尚

饗

維

康熙五十五年歲次丙申四月宜祭之辰丁丑科
進士江南江北揚州營中軍守備加一級年家眷
弟熊渭徵謹以香帛不腆之儀致奠於

皇清誥封光祿大夫內閣中書加十二級景原項太翁
之靈而言曰嗚呼天地幻泡富貴浮雲人生其間
古今同盡其存其沒亦復何悲此達人之見用以
自解也若夫老成練達足邀

宸衷之眷顧碩德宏才可備當道之諮詢如我太翁者
而一旦溘先朝露謂能已於悲悼也耶太翁為歙
南望族生而穎異讀書一目十行弱冠遊庠視青

紫如拾芥念兩尊人年邁遂棄鉛槧而從事齏策家業日駸駸起焉然太翁雖席厚履豐而持躬接物無慢容矜色一時之賢豪長者與夫名公巨卿無不折節而願與訂交以言家庭則承歡養志而喪葬必誠不愧孝子之稱以言宗黨則周急委賢而綢繆備至無忝仁人之譽至於修寢廟以妥先靈定宗祊以聯同姓凡以敦本明倫也說禮敦詩以承先澤尊師重傳以啓後昆凡以燕詒裕後也嗚呼太翁生平之懿行豈易更僕數哉而尤有爲世所難及者族人聚處皆環山瀕河原賴石堤以障水迨靈雨水汜堤爲潰決廬舍幾遭漂沒太翁

則不惜多金鳩工增築數百丈水患永絕至今族人賴以安居者皆太翁力也且也推亢宗之義施及外家修兩世之塋延旣絕之祀救人飢寒而不求人知全人功名而不望人報太翁真可謂古之君子矣年來屏絕應酬靜養一室日惟臨池揮翰拈韻賦詩以樂天真况太翁有丈夫子四人長公馳名中翰已特擢部曹次公分治延安又優陞憲副三君四君以及文孫曾彥或承大業或爲國楨皆能樹立可慰太翁之心謂宜長享遐齡弘登壽考胡爲一病不起遂飄然長往耶嗚呼哀哉徵守茲土者七載於茲久沐恩光夙承教益今忽典型

祭軒輿集卷六
謝世仰止無從寧能託達者之忘情而已於悲悼
也耶用是薄陳溪蔬敬迓仙靈太翁其來格來歆
乎尚
饗

維

康熙五十五年歲次丙申夏四月庚寅朔越八日
丁酉總督江南江西部院標奇兵營城守儀真守
府加一級張弘久謹以剛鬣柔毛清酌庶饒之儀
致祭於

皇清誥封光祿大夫內閣中書加十二級景翁項老年
翁之靈曰嗚呼人世海桑浮生蕉鹿人亦孰能免
於死哉然其生無足稱則死亦與草木同腐耳若
夫德業重於鄉邦名譽播於遐邇一旦達觀歸化
未有不令人追思慨嘆而涕淚淋漓浪者也翳維我
翁詩書世胄閱名家鍾川嶽之精英賦岐嶷之

美質當其幼也固已文駕歐蘇學貫天人及其長也遂因養親而棄咄嗟以其才識而用之齟筮之中經畫運籌無不允當一時名公鉅卿皆交相推重願交恐後焉至其爲人孝友忠信敦倫睦族持已以正接物以謙凡諸懿行難更僕數公之德業名譽如是宜其上邀天眷享期頤而進無疆奈何一旦竟厭棄塵氛飄然長逝耶嗚呼哀哉雖然公即逝而公之令子皆爲清時柱石或翱翔臺閣或經理封疆而且文孫濟濟繞膝環階盡屬珪璋令器將來尤未可量是公後裔之昌熾爲何如也則公亦可含笑於九京矣獨是弘久景仰儀型不禁

饗
悲悼東芻薄奠聊申微忱惟靈鑒只而來嘗焉尚

維

康熙五十五年歲次丙申四月庚寅朔越八日丁酉
賜進士第掌江南揚州衛事兼理屯務加二級
年家眷弟杜蔭棫謹以瓣香束帛清酌庶饘之儀
致祭於

皇清誥封光祿大夫內閣中書加十二級景原項公之
靈而言曰嗚呼生寄也死歸也達人之視生死猶
夫歸寄之常無足道也獨是生而穎異長而篤行
豪爽莫羈慷慨好義不拘拘於小節不屑屑於塵
氛如我翁者又未可以概論也翁籍新安自少至
長罕離里閭棫何由知之而詳且悉也蓋翁幼習

儒業矢志功名因屢試不第遂慨然歎曰大丈夫
當遨遊四方以窮覽天下名山大川以廣吾胸中
浩然之氣安能拘拘久居於此也遂棄儒業之維
揚運籌齎策佐贊鹽務事無鉅細靡不處治得宜
一時宗族鄉黨縉紳大夫莫不知翁之名頌翁之
德械始莅刊衛則聞翁之名真不啻有荊州之望
甫得識韓正以爲叨教有日奈何昊天不眷一病
不起藥餌罔效遂爾飄然而長逝耶且翁年踰大
耄亦不爲不壽矣則夫乘白雲而遊碧落者又何
遺恨之難平獨恨械庸愚陋質性拙交寡銜一命
於

鳳闕試轉輸於雉城方以翁爲此邦之遺獻而海內之
耆英則將咨土俗訪民情藉指畫賴持衡步先民
之矩矱奉典型於老成胡以一去而莫追予也則
安得不悵晨星之寥落而使涕泗之沾膺乎嗚呼
哀哉瞻愁雲之靄靄兮顧逝水之滔滔月正明而
輪忽仄兮地又廣漠而迢遙觸於目而心傷兮慘
於耳而淚交聽文孫之悲楚兮如子鶴之唳九臯
哀動於滿門兮痛精魂之不可招嗚呼几杖兮猶
存庭戶兮春溫音容兮何在生芻兮盈門翁朝遊
兮滄海暮宿駕兮崑崙蕪詞以奠翁靈子聞乎不
聞望九原之冥冥兮長痛哭於斯人嗚呼哀哉尚

饗

維

康熙五十五年歲次丙申夏四月庚寅朔越八日
丁酉之辰 賜進士出身江南儀真衛督理屯務
掌印守備年家眷弟李得梁謹以剛鬣柔毛清酌
庶饗之儀致祭於

皇清誥封光祿大夫內閣中書加十二級景原項公之
靈曰嗚呼我公民之望也迺今往矣感恩慕義者
涕泗滂沱矣然洒淚陳詞能頌公之德者有幾人
乎謂公天性聰明學問淵博詩古文辭出風入雅
臨池染翰駕軼蘇米且生今之世而行古之道謙
以持躬恭以接物事上則敬使下則惠有功不伐

有能不矜與人不求備檢躬若不及仁義篤厚施
及三黨不惟一本宗族賴以成立者甚衆即母黨
外氏亦均叨其庇蔭而佩德無窮焉又才能肆應
理煩治劇悉中肯綮若河決下流而東注若燭照
數計而龜卜也是固實行之彰彰人心所愛慕而
不忘者也然皆盛德之發見而非大本大原之所
在使徒以是頌公哭公曷足以有當於公之心乎
夫公之衆善兼美者蓋本於仁孝之心而著之者
也公生而穎異善屬文早歲即擅文壇若寬以歲
月取科名當如操左券顧公之心誠於事親恐功
名不可必而甘旨之有缺也遂屏去舉子業決意

以圖奉養乃天鑒其誠日益豐豫得行其志凡子
道之當爲者無不悉力以致之生養死葬備極其
隆人人咸歎爲不可及而公猶不自慊也以爲吾
事吾親而不能使子若孫繼吾志以享吾親亦吾
未盡之事也於是乎有祠堂之建俾子子孫孫世
世孝享於弗替乃公更有深焉者矣謂祖宗者吾
身之原也吾致孝於父母而不先致孝於祖宗所
謂報本追遠者謂何故特重新家廟以盡追事之
誠雖締造十年而不厭其繁糜金數萬而不覺其
多非仁孝之至者而能若是乎夫惟至性之敦篤
於本原者如此故其發而爲孝友者自油然而不

可過也其於叔伯昆弟之共祖者婚喪生計悉為經理視之有如同胞已非今人之所能矣於族人之疎遠者亦不啻親且近焉志在功名者助之膏火以成其名計在衣食者助之資斧以厚其生而又慮其不能遍及也更為勸置義田俾艱食者有永賴焉而仁益遠矣至於聚族而處之地雖瀕於河未必即為水患也乃築為石堤百丈以貽之永安此其用意之深遠尤足令人感嘆欲絕也他如睦戚屬厚鄉黨賑貧濟困本仁孝之心而推廣之者何可勝言哉所可異者贈太翁之幽宮竟得自夢中之親示晉大司馬欽公以下歷代先公之遺

像失之已不計其年數且不知歸於誰手乃欲購之而即克獲之又六百年前遠祖之讀書堂朱子所願為三面滌溪者其基久已湮沒而莫可踪跡公並能得其故址而因以復其舊觀斯殆有鬼神為之默相者歟夫精誠足以動鬼神又何於遠邇嚮風名公鉅卿之傾心結納無虛日哉我故曰公之衆善兼美皆本於仁孝之心而著之也嗟嗟公之盛德如斯固宜壽登期頤享久遠之福報乃竟棄人世而仙遊其何能無使斯人之悲怨乎然而天之報施固有在也夫孝子之後常生孝子公輕功名而重孝養公之子即皆能遵義方之訓既成

功名然後奉一品之

榮誥歸而左右奉養以終公之天年是豈尋常之福澤哉而况子又生子孫又生孫振振而蟄蟄者盡皆英俊之姿也他日華表

褒崇行見絡繹而來也已詩云孝子不匱永錫爾類公之謂乎子與公相交恨晚然見公之行而有以知公之心披陳詞以進酒上冀有以慰公之靈第恐言之無文而不足以盡公之德也嗚呼哀哉尚

饗

維

康熙五十五年歲次丙申四月庚寅朔越六日乙未宜祀之辰江南江北掘港營守府加一級年家眷晚生熊啓昌謹以辦香束帛清酌庶饗之儀致祭於

皇清誥封光祿大夫內閣中書加十二級景原太翁項老先生之靈曰嗚呼天生偉人將使立功業於世普惠澤於民故其生也恒不易而其人亦自知爲天所眷注磨礪淬厲以待大用卒至業成名立生也榮死也哀雖沒世之久猶俎豆尸祝於不衰此以知積厚者食報遠祀典所在良不虛也居今之

世不少概見其實足當之者惟我翁一人翁夙懷
大志負雄才塞古橫今不屑為補苴罅漏計鬱未
得伸因以鯁事試夫廣陵固都會人才輻集之藪
也然智者大其智能者卷其能無不交手推翁蓋
以行事中機宜丰采可畏愛故當其時兩淮南北
悉相倚翁為重每院道下車未蒞事必躬先諮詢
亦耳熟聞之久遂心折也如是自翁為兩淮柱石
利罔不興弊無不革功在

朝廷澤加海甸洵一時人傑也余生也晚又以一官繫
足未能晨夕繼見壬辰年夏便道走維揚始一望
見顏色温然藹然恍坐人於春風和氣中殆所謂

外温潤而內纘粟者乎是時翁已年近古稀強固
精明不異壯盛意天生所以福世者保佑扶持冥
冥中固隱施而不倦也不意值今夏始訃音忽至
梁木泰山一朝萎頽嗚呼功成者身退翁更上與
天遊并不留其迹耶雖然翁生前炳炳烺烺碩大
且篤上邀

天眷四世褒封下庇孫子奕禩申錫於翁復何憾乎或
慮翁創業垂五十年經營締造悉可法可傳僅著
之家乘久且湮沒是又不然嗣君諸昆仲業已垂
紳搢笏宣力效職為

盛世名臣而諸孫林立遠邁荀薛當亦無不印纍纍而

各事實錄卷八
綬若若也則異日分職史館行且備載國史以傳
摘其諸凡福國利民者臚列祀典將古所謂以勞
定國法施於民則祀者舍吾翁其誰歸用是敬具
不腆走一介以致奠惟翁之靈無遠不照異降厥
靈一鑒厥衷尚

饗

維

康熙五十五年歲次丙申四月庚寅朔越祭日癸
巳分守江南江北瓜洲城守營守備年家眷晚生
王大瑞謹以剛鬣柔毛清酌庶饗之儀致祭於

皇清誥封光祿大夫內閣中書加十二級景翁項太老
先生之靈曰嗚呼項公貴位不必登廟堂而公膺
命秩袞衣銀艾實冠班行事權不必擁旌節而公
握齏筴太府貨泉實資石畫德足以衣被九州量
足以容納衆流故其生也人爭倚毗若視日之有
圭行車之有輶及其卒也人失依歸如暗室之無
燭濟川之無舟矧余待罪戎旃依光德宇塵中請

外傳實錄卷之六
三
謁早喜御車座上談言屢陪捉麈且也蔡中郎之
善飲世號酒龍曹臨淄之多才時稱詩虎方將指
南山以介壽挹東海而爲卮年似溫公舉耆英之
會人如角里茹商雒之芝何天不惠哲人其萎能
不睇素帷而震悼揮清泪以漣泫然而諗公謀猷
上可以俾軍國迹公操履下可以作民宗其承先
也則百世蒸嘗家有不遷之廟其裕後也則一門
印綬人傳醇謹之風生而尸祝固已同於畏壘歿
而社祭當更比於樂公是則智士達觀誠未免乘
化而歸盡而其令名休烈自可垂奕禩而無窮有
肴在俎有醴在筭遡遺範兮如存攄哀思兮莫寫

翼靈鑒之孔昭載雲旗而來下嗚呼哀哉尚
饗

祭輓彙錄卷六

祭輓彙錄卷六

